

## ЎЗБЕКИСТОН ИСРОИЛ МУНОСАБАТЛАРНИНГ СИЁСИЙ- ХУҚУҚИЙ АСОСЛАРИ

ЗОКИРОВ Шохрухбек Турғунбой ўғли

*Мустақил изланувчи*



<https://doi.org/10.24412/2181-2993-2023-3-37-44>

### АННОТАЦИЯ

*Маълумки, давлатлар ўртасидаги ўзаро муносабатлар сиёсий-хуқуқий ҳужжатлар асосида амалга оширилади ва тартибга солинади. Ўзбекистон ва Исроил ўртасидаги алоқалар ҳам норматив-хуқуқий ҳужжатларга асосан олиб борилмоқда. Бу ҳужжатларга ҳар икки давлатнинг мустақил ташиқи сиёсатининг асосий йўналишларини, принципларини белгилаб берувчи миллий стратегиялари ва икки томонлама имзоланган шартномалар, келишувлар, битимлар ва бошқалар кирди.*

**Калит сўзлар.** *ҳамкорликнинг шарномавий-хуқуқий базаси, давлатлараро ҳужжатлар, ҳукуматлараро ҳужжатлар, идоралараро ҳужжатлар.*

### ABSTRACT

*It is known that mutual relations between states are implemented and regulated on the basis of political and legal documents. Relations between Uzbekistan and Israel are conducted based on normative legal documents. These documents include national strategies and bilaterally signed treaties, agreements, agreements, etc., which define the main directions and principles of the independent foreign policy of both countries.*

**Keywords.** *legal basis of cooperation, interstate documents, intergovernmental documents, interdepartmental documents.*

### КИРИШ (Introduction)

Ўзбекистоннинг ташқи сиёсати ва халқаро алоқалари унинг бош қомуси ҳисобланган Конституциясида белгилаб қўйилган. Хусусан, ушбу олий қонуннинг 17-моддасида: “Ўзбекистон Республикаси халқаро муносабатларнинг тўла ҳуқуқли субъектидир. Унинг ташқи сиёсати давлатларнинг суверен тенглиги, куч ишлатмаслик ёки куч билан таҳдид қилмаслик, чегараларнинг дахлсизлиги, низоларни тинч йўл билан ҳал этиш, бошқа мамлакатларнинг ички ишларига аралашмаслик қоидаларига ва халқаро ҳуқуқнинг умумэтироф этилган бошқа қоидалари ҳамда нормаларига асосланади”,<sup>1</sup> деб қайд этилган.

<sup>1</sup> Ўзбекистон Республикаси Конституцияси // Веб-сайт <https://constitution.uz/uz/clause/index>

Шунингдек, Ўзбекистон 2012 йил 10 сентябрдаги қонун билан тасдиқланган Ўзбекистон Республикасининг Ташқи сиёсий фаолият концепцияси асосида ўз ташқи сиёсатини олиб боради. Мазкур ҳужжатнинг учинчи бўлими Ўзбекистон ташқи сиёсатининг асосий йўналишларига бағишланган бўлиб, Яқин ва Ўрта Шарқ минтақаси давлатлари билан ҳамкорлик масаласига алоҳида тўхталиб ўтилган.

Унга мувофиқ, “Ўзбекистон Яқин ва Ўрта Шарқ мамлакатлари билан анъанавий, тарихий-маданий алоқалар ҳамда дунёнинг бу қисмида рўй бераётган изчил ўзгаришларнинг келгусидаги хусусиятларини инобатга олган ҳолда, ўзаро манфаатли муносабатларни ҳар томонлама ривожлантириш ва мустаҳкамлашни давом эттиради. Ўзбекистон Республикаси мазкур минтақанинг етакчи мамлакатлари билан сиёсий мулоқотни ҳамда савдо-иқтисодий алоқаларни мустаҳкамлаш ниятида бўлиб, транспорт коммуникациялари, молия ва инвестиция соҳаларидаги ҳамкорликни ривожлантириш учун саъйи-ҳаракатларини кучайтиради”<sup>2</sup>.

Шу билан бир қаторда, 1992-йилда Кнессетнинг 25-чақириқ депутатлари томонидан Исроил Давлати ташқи сиёсатининг асосий йўналишларини белгилаб берган расмий ҳужжатда, мамлакат раҳбарияти Собик Иттифоқ республикалари, биринчи навбатда, мусулмон республикалари (*Ўзбекистон, Козогистон, Турманистон, Қирғизистон, Озарбайжон ва Тожикистон*) билан алоқаларни ривожлантириш ва мустаҳкамлашни қайд этилган<sup>3</sup>.

Бугунги кунда Исроил Яқин Шарқнинг ривожланган ва етакчи давлатлардан бири ҳисобланади. Ўзбекистон дунёнинг 130 дан ортиқ давлатлари билан дипломатик алоқалар ўрнатган бўлиб, 55 та мамлакатда ўзининг дипломатик ва консуллик ваколатхоналарига эга<sup>4</sup>. Ушбу мамлакатлар орасида Исроил билан биринчилардан бўлиб ўзаро сиёсий-ҳуқуқий муносабатларни йўлга қўйган.

Ўзбекистон Республикасининг Исроил Давлати билан турли соҳалардаги алоқалари тегишли сиёсий ва ҳуқуқий асослар билан мустаҳкамланган. Ўтган давр мобайнида давлатлар ўртасида икки томонлама характердаги бир қатор ҳужжатлар имзоланган бўлиб, улар ўзаро муносабатларни йўлга қўйиш ва янада ривожлантиришда муҳим пойдевор бўлиб келмоқда.

<sup>2</sup> Ўзбекистон Республикаси Олий Мажлиси палаталарининг Ахборотномаси, 2012 йил, 9/1 (1437)-сон, 239-модда, 14-бет.

<sup>3</sup> См.: Basic Policy Guidelines of the 25th Government, July 1992 // Foreign Policy. Historical Documents 1992—1994. Israel Ministry of Foreign Affairs, 24 January 2020.

<sup>4</sup> O‘zbekiston tashqi siyosati // Веб сайт МИД РУ.-<https://mfa.uz/uz/pages/vneshnaya-politika>

Икки давлатнинг ўзаро алоқалари ўрнатилган дастлабки йилларда муносабатларнинг сиёсий-институционал идораларини ташкил этиш, савдо-иқтисодий ва маданий-гуманитар соҳаларда ҳамкорлик қилиш юзасидан **ҳуқуқий асослар ишлаб чиқилган.**

Бугунги кунда, Ўзбекистон ва Исроил муносабатларининг ҳуқуқий асослари сиёсий, савдо-иқтисодий, илмий-техникавий, туризм, маданият, соғлиқни сақлаш, фан ва маориф, қишлоқ хўжалиги, атроф-муҳит муҳофазаси, божхона иши, инвестицияларни рағбатлантириш ва ўзаро ҳимоя қилиш соҳаларидаги икки давлат алоқаларни тартибга солишга хизмат қилади.

### **МУҲОКАМА ВА НАТИЖАЛАР (Discussion and results)**

Икки мамлакат ўртасидаги ҳамкорликнинг ҳуқуқий асосларини таҳлил қилиш натижасида аниқландики, бугунги кунгача Ўзбекистон ва Исроил давлатлари томонидан **19 та ҳужжат** имзоланган бўлиб, улардан **14** таси ҳукуматлараро ва **5** таси идоралараро ҳужжатлардир<sup>5</sup>.

Имзоланган ҳужжатларни соҳалар кесимида таҳлил қилинганида, савдо-иқтисодий соҳага тегишли ҳужжатлар **3 тани** ташкил этган бўлса, сиёсий соҳадаги ҳамкорликка оид ҳужжатлар **3 та**, божхона ва солиқ қонунчилиги соҳасига доир **2 та**, махфийлик ва маълумотларни алмашишга доир **2 та**, маданият, фан ва маориф соҳаларига оид **2 та**, илмий-техник ва техникавий ҳамкорлик соҳаларида **2 та** ҳамда қишлоқ хўжалиги, атроф-муҳитни муҳофаза қилиш, транспорт, соғлиқни сақлаш ва тиббиёт соҳаларига оид **1 тадан** ҳужжатлар имзоланган.

Ўзбекистон-Исроил муносабатларини тартибга солувчи дастлабки ҳужжатлар Исроил Ташқи ишлар вазири Ш.Переснинг Ўзбекистонга ташрифи чоғида 1994 йил 4 июлда Тошкент шаҳрида қуйидаги 4 та ҳужжат имзоланган:

- “Ўзбекистон Республикаси Ҳукумати ва Исроил Ҳукумати ўртасида инвестицияларни рағбатлантириш ва ўзаро ҳимоя қилиш тўғрисида”ги Битим.

- “Ўзбекистон Республикаси Ҳукумати ва Исроил Давлати Ҳукумати ўртасида Ҳаво транспорти тўғрисида”ги Битим.

- “Ўзбекистон Республикаси Ҳукумати ва Исроил Давлати Ҳукумати ўртасида туризм соҳасида ҳамкорлик қилиш тўғрисида”ги Битим.

- Ўзбекистон Республикаси Ташқи ишлар вазирлиги ва Исроил Давлати Ташқи ишлар вазирлиги ўртасида маслаҳатлашувлар тўғрисида Протокол<sup>6</sup>.

<sup>5</sup>Ўзбекистон-Исроил муносабатлари // Ўзбекистон Республикаси Ташқи ишлар вазирлиги маълумотномаси. Веб-саҳифа: <https://mfa.uz/uz/pages/with-asia-africa>

<sup>6</sup> Израиль - Узбекистан // Материалы Посольства Государства Израиль в Республике Узбекистан // Веб-сайт: <https://embassies.gov.il/tashkent/8F.aspx>

Жумладан, 1997 йил 18 февралдан кучга кирган “Ўзбекистон Республикаси Ҳукумати ва Исроил Ҳукумати ўртасида инвестицияларни рағбатлантириш ва ўзаро ҳимоя қилиш тўғрисида”ги Битим асосида инвестицияларни рағбатлантириш ва ўзаро ҳимоя қилиш ҳар иккала давлатнинг ўзига хос ишчанлик ташаббуси ва равнақ топиши учун муҳим омил бўлиб хизмат қилишини эътироф этилган<sup>7</sup>.

“Ўзбекистон Республикаси Ҳукумати ва Исроил Давлати Ҳукумати ўртасида Ҳаво транспорти тўғрисида”ги Битим 1996 йил 14 апрелдан кучга кирган бўлиб, икки мамлакат ҳамда икки халқ ўртасида дўстлик, ўзаро бир-бирини тушуниш ва ҳамкорликни йўлга қўйиш ва ҳимоя қилиш борасида ҳаво транспортини муҳим восита сифатида тан олган ҳолда, Ўзбекистон ва Исроил ўртасида ҳаво транспортини ривожлантиришга кўмак бериш ва бу соҳада янада тўлақонли халқаро ҳамкорликка эришиш ҳамда икки давлат ўртасида ҳаво қатновини йўлга қўйиш мақсадларини кўзлаб имзоланган<sup>8</sup>.

Ўзбекистон ва Исроил Ташқи ишлар вазирлари С.Саидқосимов ва Ш.Перес томонидан имзоланган “Ўзбекистон Республикаси Ташқи ишлар вазирлиги ва Исроил Давлати Ташқи ишлар вазирлиги ўртасида маслаҳатлашувлар тўғрисида”ги Протоколга биноан икки давлат ташқи сиёсий идоралари мунтазам равишда вазир ўринбосарлари даражасида сиёсий маслаҳатлашувларни ўтказиб боради.

*Маълумот учун: 1994 - 2021 йиллар мобайнида ушбу ҳужжат асосида сиёсий маслаҳатлашувларнинг олти доираси ўтказилди.*

Шунингдек, икки давлат ҳуқуқ тартибот органларининг ўзаро ҳамкорлик алоқаларини ҳам тартибга солиш учун 1995 йил 13 декабрда Тошкент шаҳрида Ўзбекистон Республикаси Ички ишлар вазирлиги ва Исроил Давлати Жамоат хавфсизлиги вазирлиги ўртасида ўзаро англашув Протоколи имзоланган.

Маданий-гуманитар соҳадаги икки томонлама ҳамкорлик алоқаларини тартибга солувчи ҳужжат 1997 йил 7 апрелда Қуддус шаҳрида имзоланган “Ўзбекистон Республикаси Ҳукумати ва Исроил Давлати Ҳукумати ўртасида

<sup>7</sup> “Ўзбекистон Республикаси Ҳукумати ва Исроил Ҳукумати ўртасида инвестицияларни рағбатлантириш ва ўзаро ҳимоя қилиш тўғрисида”ги Битим // Ўзбекистон Республикаси халқаро қонун ҳужжатлари тўплами // Веб-саҳифа: <https://www.lex.uz/docs/2654172>

<sup>8</sup> “Ўзбекистон Республикаси Ҳукумати ва Исроил Давлати Ҳукумати ўртасида Ҳаво транспорти тўғрисида”ги Битим // Ўзбекистон Республикаси халқаро қонун ҳужжатлари тўплами // Веб-саҳифа: <https://www.lex.uz/docs/2573595>

маданият, фан ва маориф соҳаларидаги ҳамкорлик тўғрисида”ги Битим ҳисобланади<sup>9</sup>.

Илмий-техникавий соҳа икки давлат учун ҳам ҳамкорликнинг устувор йўналишларидан бири ҳисобланади. Шу боисдан, 1997 йил 26 сентябрда Тошкент шаҳрида "Ўзбекистон Республикаси ва Исроил Давлати метеорологик хизматлари ўртасида илмий-техник ҳамкорлик тўғрисида"ги Битим имзоланган.

1998 йил 14-16 сентябр кунлари Ўзбекистон Республикасининг Биринчи Президенти И.Каримовнинг Исроил Давлатига амалга оширган давлат ташрифи икки томонлама муносабатларни ривожланишига муҳим туртки берди. Ташриф асосий куни, яъни 15 сентябрда Қуддус шаҳрида мамлакатлар ўртасида ҳамкорликнинг кўплаб йўналишларини тартибга солувчи **қуйидаги 8 та ҳужжат имзоланди. Булар:**

- “Ўзбекистон Республикаси Ҳукумати ва Исроил Давлати Ҳукумати ўртасида **иккиёқлама солиқ солинишининг олдини олиш** ҳамда даромад ва сармоя солиқларини тўлашдан бош тортишни бартараф қилиш тўғрисида”ги Конвенция;

- “Ўзбекистон Республикаси Ҳукумати ва Исроил Давлати Ҳукумати ўртасида **савдо ва иқтисодий ҳамкорлик тўғрисида**"ги Битим;

- "Ўзбекистон Республикаси Ҳукумати ва Исроил Давлати Ҳукумати ўртасида **атроф-муҳитни муҳофаза қилиш соҳасида** ҳамкорлик тўғрисида"ги Битим;

- "Ўзбекистон Республикаси Ҳукумати ва Исроил Давлати Ҳукумати ўртасида **қишлоқ хўжалиги соҳасида** ҳамкорлик тўғрисида"ги Битим;

- "Ўзбекистон Республикаси Ҳукумати ва Исроил Давлати Ҳукумати ўртасида **техникавий ҳамкорлик тўғрисида**"ги Битим;

- "Ўзбекистон Республикаси Ҳукумати ва Исроил Давлати Ҳукумати ўртасида **божхона иши соҳасида** ўзаро кўмаклашув тўғрисида Битим;

- "Ўзбекистон Республикаси Ҳукумати ва Исроил Давлати ҳукумати ўртасида **соғлиқни сақлаш ва тиббиёт соҳасида** ҳамкорлик тўғрисида"ги Битим;

- Ўзбекистон Республикаси Ҳукумати ва Исроил Давлати Ҳукумати ўртасида ўзаро **маданий марказларни таъсис қилиш** ва уларнинг фаолияти тўғрисида"ги Протокол<sup>10</sup>.

<sup>9</sup> “Ўзбекистон Республикаси Ҳукумати ва Исроил Давлат Ҳукумати ўртасида маданият, фан ва маориф соҳаларидаги ҳамкорлик тўғрисида”ги Битим // Ўзбекистон Республикаси халқаро қонун ҳужжатлари тўплами // <https://www.lex.uz/docs/2171375>

Шунингдек, 1999 йил 1 февралдан кучга кирган “Ўзбекистон Республикаси Ҳукумати ва Исроил Давлати Ҳукумати ўртасида савдо ва иқтисодий ҳамкорлик тўғрисида”ги Битимда икки далаат ўртасидаги ўзаро савдо ва иқтисодий алоқаларни амалга ошириш принциплари, қоидалари ва тартибини ўрнатишдан масалалари тартибга солинган.<sup>11</sup>

“Ўзбекистон Республикаси Ҳукумати ва Исроил Давлати Ҳукумати ўртасида қишлоқ хўжалиги соҳасида ҳамкорлик тўғрисида”ги Битим расман 2000 йил 19 сентябрдан кучга кирган бўлиб, ушбу битим қишлоқ хўжалиги соҳасида ва қишлоқ хўжалигига алоқадор соҳаларда ўзаро манфаатли ҳамкорликни ривожлантиришга ҳамда мамлакатлар халқлари орасида дўстона муносабатларнинг келгусида янада кучайтириш мақсадида имзоланган<sup>12</sup>.

1999 йил 16 мартдан кучга кирган “Ўзбекистон Республикаси Ҳукумати ва Исроил Давлати Ҳукумати ўртасида техникавий ҳамкорлик тўғрисида”ги Битимнинг **2 моддасига** кўра, ҳамкорлик дастурининг асосий мақсади бўлиб ўз фаолиятини очик бозор иқтисодиётига мувофиқ олиб боришга қодир бўлган индивидуал фермерлар ва фермерлик ассоциациялари учун шароитларни рағбатлантириш ҳисобланади<sup>13</sup>.

Шунингдек, Исроил билан тиббиёт соҳасида ҳамкорлик алоқалари "Ўзбекистон Республикаси Ҳукумати ва Исроил Давлати ҳукумати ўртасида соғлиқни сақлаш ва тиббиёт соҳасида ҳамкорлик тўғрисида"ги Битим орқали тартибга солинган.<sup>14</sup>

1999 йил 11 ноябрда Тошкент ва Қуддус шаҳарларида "Ўзбекистон Республикаси Ҳукумати ва Исроил Давлати Ҳукумати ўртасида махфийлик тўғрисида"ги Битим ва 24 ноябрда "Ўзбекистон Республикаси ва Исроил Давлати Ҳукуматлари ўртасида ўзаро англашув" Меморандуми имзоланган.

2013 йил 26 ноябрда Тель-Авив шаҳрида Ўзбекистон Республикаси Савдо-саноат палатиси билан Исроил Давлати Федерал савдо палатаси ўртасида ҳамкорлик тўғрисида"ги Битим имзоланган.

<sup>10</sup> Израиль - Узбекистан // Материалы Посольства Государства Израиль в Республике Узбекистан // Веб-сайт: <https://embassies.gov.il/tashkent/8F.aspx>

<sup>11</sup> “Ўзбекистон Республикаси Ҳукумати ва Исроил Давлати Ҳукумати ўртасида савдо ва иқтисодий ҳамкорлик тўғрисида”ги Битим // Ўзбекистон Республикаси халқаро қонун ҳужжатлари тўплами // Веб-саҳифа: <https://www.lex.uz/docs/2171049>

<sup>12</sup> “Ўзбекистон Республикаси Ҳукумати ва Исроил Давлати Ҳукумати ўртасида қишлоқ хўжалиги соҳасида ҳамкорлик тўғрисида”ги Битим // Ўзбекистон Республикаси халқаро қонун ҳужжатлари тўплами // Веб-саҳифа: <https://lex.uz/docs/2169241>

<sup>13</sup> "Ўзбекистон Республикаси Ҳукумати ва Исроил Давлати Ҳукумати ўртасида техникавий ҳамкорлик тўғрисида"ги Битим // Ўзбекистон Республикаси халқаро қонун ҳужжатлари тўплами // Веб-саҳифа: <https://www.lex.uz/docs/2616688>

<sup>14</sup> "Ўзбекистон Республикаси Ҳукумати ва Исроил Давлати ҳукумати ўртасида соғлиқни сақлаш ва тиббиёт соҳасида ҳамкорлик тўғрисида"ги Битим // Ўзбекистон Республикаси халқаро қонун ҳужжатлари тўплами // Веб-саҳифа: <https://lex.uz/docs/2171467>

Шу билан бирга, умумий тахдидларга қарши биргаликда кураш олиб бориш мақсадида 2018 йилнинг 16 февраль куни Тошкент шаҳрида ва 22 февраль куни Париж (Франция) шаҳрида “Ўзбекистон Республикаси Бош прокуратураси ҳузуридаги солиқ, валюта жиноятлари ва жиноий даромадларни легаллаштиришга қарши курашиш департаменти ва Исроил Давлати Жиноий фаолиятдан олинган даромадларни легаллаштириш ва терроризмни молиялаштиришнинг олдини олиш бўйича бошқармаси ўртасида жиноий фаолиятдан олинган даромадларни легаллаштириш ва терроризмни молиялаштириш бидан боғлиқ маълумотларни алмашиш тўғрисида” ўзаро ҳамкорлик Меморандуми имзоланиши ушбу йўналишдаги ҳамкорликда муҳим ҳуқуқий асос бўлиб хизмат қилмоқда<sup>15</sup>.

Давлатлараро ҳамкорлик алоқаларининг жадаллашётганининг исботи сифатида, 2021 йил 11 январь куни Ўзбекистон Республикаси ва Исроил Давлати ўратасида **ҳамкорликнинг шарномавий-ҳуқуқий базасини кенгайтириш ва инвентаризация қилиш** бўйича икки давлат ташқи ишлар вазирликлари ҳуқуқий бошқармалари ўртасида видеоконференцалоқа режимида **маслаҳатлашувлар ўтказилди**. Шарномавий-ҳуқуқий базанинг инвентаризация қилиниши натижасида, маълум бўлишича икки давлат ўртасида имзоланган жами 19 та ҳужжатдан **18** та ҳужжат бугунги кунда амал қилаётгани аниқланди. Жумладан, ушбу ҳужжатларнинг **14** таси ҳукуматлараро ва **4** таси идоралараро битимлар ташкил этади. Жумладан, ушбу маслаҳатлашувларда томонлар бугунги кунгача имзоланган халқаро битим ва шартномаларнинг ҳуқуқий мақомини аниқлаш, ўз аҳамиятини йўқотган ҳужжатларни белгилаш, ҳамкорликнинг шартномавий-ҳуқуқий асосларини такомиллаштириш бўйича таклифлар тайёрлаш масалаларини, шунингдек кўриб чиқиладиган ҳужжатлар лойиҳаларини муҳокама қилдилар.

Шу билан бир қаторда, маслаҳатлашув якуни бўйича савдо-иқтисодий, ҳуқуқий ёрдам соҳасида ўзаро ҳамкорлик шартномалари, ташкиллаштирилган меҳнат миграцияси йўналишда ҳамкорлик ва бошқа битимлар лойиҳаларини кўриб чиқишни фаоллаштиришга икки томоннинг келишиб олгани **ҳамкорликнинг реал тарзда жонланганини англатади**.

Сўнги йилларда икки давлатнинг жадлашётган алоқлари натижасида, бугунги кунда Ўзбекистон ва Исроил икки томонлама муносабатларнинг ҳуқуқий асослари янги меърий ҳужжатлар билан тўлдирилдириш ва ҳамкорлик алоқаларини мустаҳкамлаш мақсадида қуйидаги **9** та янги давлатлараро,

<sup>15</sup> Ўзбекистон Республикаси Ташқи ишлар вазирлиги маълумотномаси.

хукуматлараро ва идоралараро **хужжатлар лойиҳалари** томонлар зртасида кўриб чиқилмоқда ва имзоланганга тайёрланмоқда. Булар:

**Давлатлараро хужжатлар:**

- Фуқаролик ва оилавий ишлар бўйича ўзаро ҳуқуқий ёрдам кўрсатиш тўғрисида Шартнома;

- Жиноий ишлар бўйича ўзаро ҳуқуқий ёрдам кўрсатиш тўғрисида Шартнома;

- Экстрадиция тўғрисида Шартнома.

**Ҳукуматлараро хужжатлар:**

- Жиноятчиликка қарши курашишда ҳамкорлик қилиш тўғрисида Битим;

- Исроил давлати ҳудудида вақтинчалик меҳнат фаолиятини амалга ошираётган Ўзбекистон Республикаси фуқаролари бўлган меҳнаткаш-мигрантларнинг ҳуқуқларини ҳимоя қилиш ҳамда ташкилий асосда танлаб олиш ва ишга жойлаштириш тўғрисида Битим;

- 1998 йил 15 сентябрда имзоланган иккиёқлама солиқ солинишининг олдини олиш ҳамда даромад ва сармоя солиқларини тўлашдан бош тортишни бартараф қилиш тўғрисидаги ҳукуматлараро Конвенцияга қўшимчалар киритиш тўғрисида Баённома;

- 1994 йил 4 июлда имзоланган Ҳаво қатнови тўғрисидаги ҳукуматлараро Битимга қўшимчалар киритиш тўғрисида Баённома.

**Идоралараро хужжатлар:**

- Ўзбекистон Республикаси Ҳукумати билан Исроил Давлати Ташқи ишлар вазирлиги ҳузуридаги Ривожланиш бўйича халқаро ҳамкорлик агентлиги “МАШАВ” ўртасида ривожланиш бўйича ҳамкорлик тўғрисида Англашув Меморандуми;

- Ўзбекистон Республикаси Ташқи ишлар вазирлиги билан Исроил Давлати Ташқи ишлар вазирлиги ўртасида ҳамкорлик ва икки томонлама маслаҳатлашувлар тўғрисида Протокол.

Хулоса сифатида шунини таъкидлаш зарурки, икки давлат ўртасидаги муносабатларнинг меърий-ҳуқуқий асослари мустаҳкамланиб бормоқда. Жумладан, икки томонлама алоқалар йўлга қўйилган даврдан бугунги кунга қадар, ўзаро ҳамкорликка оид 20 га яқин муҳим хужжатлар қабул имзоланиб, мустаҳкам ҳуқуқий асос яратилди.